

桂平縣志

桂平縣志

桂平縣志

民國庚申粵東
編譯公司排印

桂平重修縣志叙

桂平粵右大邑也其地廣百五十里袤三百七十里人口四十萬昔在漢代爲布山阿林兩縣唐析置皇化大賓羅繡常林與布阿兩縣爲六分隸潯繡二州其區畫之密如此以視夷壤羈縻土州襲據遠殊矣而志書之作自乾隆前道光後無聞焉此非往代文化之遲亦非近年士夫不以文獻爲重也攷古志地者所務在山川方域風俗物產而已唐之元和郡縣志始涉及古蹟宋太平寰宇記則兼及人物藝文自是作者踵武輒用總志之類目爲專志分門故言郡縣志者斷自宋始然多起吳越之間元明而後諸省始互相仿效桂平

者潯州首邑也潯州自明迄清數百年間志修八次

按潯志自明崇禎

二以前但有抄本及崇禎間知府戴金重修并爲鑲板授是何

文助修爲四次乾隆二十年知府胡公修爲五次道光緒十八

年知府夏公修爲六次諸邑事咸藉登載而桂平官紳每以首邑之故

先預提挈并多紓其杼柚夫既盡瘁於全郡之鉛槧自無暇
於營一邑之纂修惟乾隆間連江吳公樞亭來任縣治爲欲
周知一邑之事山川方域咸列丹青戶口財賦日陳几案積
錄成帙可資志料因利乘便加以修飾遂獲成書取名資治
圖志其始固非爲志作而志卒因之閱七十年長山袁公琴
池來任去道光五年知府孫公修府志時不過十餘稔而復

修縣志蓋因孫志之畧而不備而欲以縣志彌其憾也

按魏府

志叙之胡志失之繁作孫志失之畧繁之失小畧之失大傳今人

無物僅增會陞遠一人徒以其生年月日與其孫同而載之尤

已得然則吳袁兩公之作固各有其因不能以他方之遲早爲

例而與乾隆前及道光後之以府志爲志者抑又情事差殊

者矣暨辛亥改革溥治久廢府志已無庸再修而自清代光

宣以來邑中新政迭興如學校實業自治之屬咸爲諸郡邑

先驅又往日金田一役魏府志多書缺有間夏府志亦以多

所忌諱或詳或隱閱者猶未滿懷其中亟當補志者不少至

於賢能師儒文學與夫男女節義貞孝之行出於見聞可傳

可法者更難湮沒抑無待論也則紀載之事視吳袁兩公時
又豈可同日語哉丁巳秋余來忝知縣事聞前任黃君東園
設局修志草創未成余思竟厥業謀於縉紳父老咸爲興起
樂與綢繆始也局困於資人牽於事繼乃資與人集規模旣
定余卸職而去今重宰是邦書已告成是非余之功乃前余
而來者之善爲倡後余而至者之善爲繼而邦人君子奔走
採掇有始有終其心力之爲尤難沒焉爰弁言如右若夫志
書與吏事相關則永淳古君捧之已序及之不復贅時民國
九年夏正庚申秋九月也知桂平縣事南昌李本銘序

志名最古孟子滕文篇引志云喪祭從先祖是也而方志之

名則見於周禮外史氏掌四方之志誦訓氏掌道方之志以
詔觀事然其書無攷至漢書則有地理志而非專書也唐李
吉甫始爲郡縣志遍載十道不限一方宋朱長文乃有吳郡圖
經羅願有新安志實爲各府縣志之權輿自是以後作者漸
衆不能盡錄蓋治化愈進則地方之情形愈悉而記載亦愈
詳自然之勢也攷桂邑志書之作始自乾隆戊子先賢吳公
樞亭定名資治圖志蓋欲有所資以爲治即按圖而可知并
望後之官斯土者顧名思義稽故實而措之宜其旨弘矣越
七十年道光壬寅復有先賢袁公琴池踵而修之先達黃公
雲湄主任纂修畧變體例易名桂平縣志書成於洪楊金田

起事之前七年時地方漸形不靖故書中於練團防盜諸政三致意焉其致治未亂保邦未危之意灼然可見雖易名縣志猶是資治之意也歷咸同光宣以至民國又復七十年矣及今不修則無徵不信前任黃君東園有見及此爲倡行修志謀諸耆紳長老僉以爲不可緩乃聘邑紳程先生子良主任纂修雖以人事無常滄桑屢易而卒底於成己未秋予由陸川調桂得受讀終篇於土地政事人文俱能綜本末要始終復以橫議之披猖懼斯文之將喪於國粹聖教及仁孝清貞之俗咸褒揚而羅舉之其銳意於詳人所畧蓋將爲趨駑新風而鄙薄舊俗者作回頭之岸撫卷反復不覺古今去來

之在前比之樞亭琴池兩作有過之無不及也抑又聞之修史者必採夫各志故論者謂讀通志不若讀郡志讀郡志不若讀縣志君子以爲知言今是書在桂平旣爲信志推之天下後世卽可爲信史矣余承乏斯邑無補於志聿觀厥成遂叙言如右民國九年春知桂平縣事永淳古濟勳謹識

邑志重修經始於丙辰春間前縣長黃公東園捐百金開局於潯陽書院委紳勸捐襄事屬余總纂余不獲已爲發凡起例以遣采訪諸事方草創而捐資猝未集度支垂匱屬國會重開余亟赴都局遂散丁巳秋縣長李公佑臣蒞事續籌設局因余未歸以總纂事乞於黃少瀛先生先生以老病辭時

各門漸有分纂仍苦資盡比余歸而局已散戊午春縣長屬
余竟前緒余鑒於初次之開局而後勸捐欲速不達稍休以
待資集復值幼兒痘折未能強抑於懷瘍結右肘握管多艱
遲至八月局始復開其年冬十一月分纂稿脫局亦以資盡
而散余乃携稿東粵將總纂待刊自嫌采訪多畧或又以楊
蕭韋石諸人不立傳難饜人望已未暮春余復歸邑重訪而
五齡弱女陡爾中暑而亡情緒益惡愴然復東甫卸裝忽遭
劇瘡居數月吾家端門來促曰志猶未可刻耶余答以無資
端門曰吾先支出後取償於衆衆不能償則請同邑之仕於
兩粵者爲之助不亦可乎余然其言而同邑諸君子亦慨助

不吝余乃檢閱各稿參証羣籍舊聞或誤各爲訂正訪錄有缺時爲補詢或事非局例所容則爲增設類目自去冬迄今春增且刪謄而印者什之九旋牽鄉事重翻舊牘日月幾何東江戰起涉夏徂秋飄驚羊石余乃避亂於番禺南村主門人鄔慶時家旣斷風鶴且遠賓朋遂獲從容成書全行付梓計五十九卷一千二百五十二頁約五十餘萬言夫天下事因易而創難昔陳穀亭先生爲吳令修資治圖志立言無多而慘淡經營歷數寒暑而始成事在創也黃雲湄先生爲袁令纂修舊志旣藉吳志以爲基復有新出孫修府志以爲之助采掇不煩故閱數月而稿脫事在因也今茲之作文三倍

兼值世變見聞是非遠異乎昔故綱目更張創多因少遂歷
五稔始克出版然除去中間停擱日月積計纂修者僅歲有
餘而已以言完善吾斯未信至於蹉跎幸免焉矣其分纂與
經理及捐助題名已著卷首卷末不具書民國九年夏正庚
申秋九月程大璋記於番禺南村草堂

例言 二十四則

一全書纂修義例已分見於各類序文中今以餘旨未盡爲補列於後

一舊志有二種一爲乾隆間吳志綰之資治圖志二爲道光間袁湛業之桂平縣志吳志書與板俱已燬沒袁志板亦燬而書存民間僅得一部始欲師范書續班書之例於舊志所已有者略而不錄恐新者存而舊者佚迺以舊志爲底本而增修之以期自漢開邑以來百里文獻久而可徵仍名桂平縣志一切紀載斷至己未年止

即民國八年

一舊志成於道光二十三年

解志即袁志後做此

迄今七十有餘稔中

經咸同間之大亂重以光宣間之新政事蹟既繁則門類
比舊宜增第恐其紛而無緒因倣鄭獻甫象州志例而略
變通之分五大綱曰紀地曰紀政曰紀事曰紀人曰紀文
其餘細目另有專篇茲不備錄

一紀政即象志紀官紀事即象志紀故官義苦狹故義嫌泛
因易名政事以求該切

一清儒論修志者有兩大家戴東原務詳沿革章實齋亟崇
文獻蓋戴長於經章諳於史故所言殊旨如此其實兩者
俱難偏廢而舊志於沿革一門寥寥十數行文簡而事脫
今別爲創作其中亦有援引原文者仍爲注明以示異同

不苟

一歷代建置遺蹟廢自清朝者入古蹟其爲民國所罷者仍分載於各類中而孰存孰圯並爲注明

一近代學者喜談金石舊志缺如理宜彌憾今以諸碑書體稱善者列古蹟中其名山摩崖及壇廟題額苟屬名流遺蹟無論字數多寡咸爲訪錄金屬自銅鼓而外如鐵柱銅鑪諸物造自明朝以前者亦爲考載此在本境志例無異大輅椎輪其中不免挂漏世有永叔明誠當資而諒之一古之志地者旨在經邦治民故山川風土特詳自宋而後喜載名勝體非不善然承其流者揚之太甚則志乘同於